

梁

書

一

蘇子瞻
題

PDG

百衲本二十四史

梁書

四部叢刊史部

上海涵芬樓借北平
圖書館藏宋蜀大字
本景印闕卷以涵芬
樓藏元明遞修本配
補原書板匡高二十
三公分寬十九公分

梁書目錄

共五十六卷

本紀六卷

列傳五十卷

本紀第一

梁書一

武帝上

本紀第二

梁書二

武帝中

本紀第三

梁書三



武帝下

本紀第四

梁書四

簡文皇帝

本紀第五

梁書五

元帝

本紀第六

梁書六

敬帝

列傳第一

梁書七

皇后

太祖張皇后 高祖郝皇后

太宗王皇后 高祖丁貴嬪

高祖阮脩容 世祖徐妃

列傳第二

梁書八

昭明太子 哀太子

愍懷太子

列傳第三

梁書九

王茂 曹景宗

柳慶遠

列傳第四

梁書十

蕭穎達

夏侯詳

蔡道恭

楊公則

鄧元起

列傳第五

梁書十一

張弘策

庾域

鄭紹叔

呂僧珍

列傳第六

梁書十二

柳琰

弟忱

席闡文

韋叡

族弟愛

列傳第七

梁書十三

范雲

沈約

列傳第八

梁書十四

江淹

任昉

列傳第九

梁書十五

謝朓

弟子覽

列傳第十

梁書十六

王亮

張稷

王瑩

列傳第十一

梁書十七

王珍國

馬仙琕

張齊

列傳第十二

梁書十八

張惠紹

馮道根

康絢

昌義之

列傳第十三

梁書十九

宗史

劉坦

樂藹

列傳第十四

梁書二十

劉季連

陳伯之

列傳第十五

梁書二十一

王瞻

王志

王峻

王暕

子訓

王泰

王份

孫錫 愈

張充

柳惲

蔡搏

江蒨

列傳第十六

梁書二十二

世祖五王

臨川王宏

安成王秀

南平王偉

鄱陽王恢

始興王憺

列傳第十七

梁書二十三

長沙嗣王業 永陽嗣王伯游

衡陽嗣王元簡 桂陽嗣王象

列傳第十八

梁書二十四

蕭景

弟昌昂 昱

列傳第十九

梁書二十五

周捨

徐勉

列傳第二十

梁書二十六

范岫

傅昭

弟映

蕭琛

陸杲

列傳第二十一

梁書二十七

陸倕

到洽

明山賓

殷鈞

陸襄

列傳第二十二

梁書二十八

裴邃

兄子之高之平之橫

夏侯亶

弟夔魚弘

韋放

列傳第二十三

梁書二十九

高祖三王

南康王績

廬陵王續

邵陵王綸

列傳第二十四

梁書三十

裴子野

顧協

徐摛

鮑泉

列傳第二十五

梁書三十一

袁昂

子君正

列傳第二十六

梁書三十二

陳慶之

蘭欽

列傳第二十七

梁書三十三

王僧孺

張率

劉孝綽

王筠

列傳第二十八

梁書三十四

張緬弟續綰

列傳第二十九

梁書三十五

蕭子恪

弟子範子顯子雲

列傳第三十

梁書三十六

孔休源

江革

列傳第三十一

梁書三十七

謝舉

何敬容

列傳第三十二

梁書三十八

朱异

賀琛

列傳第三十三

梁書三十九

元法僧

元樹

元願達

王神念

楊華

羊侃

子鵬

羊鴉仁

列傳第三十四

梁書四十

司馬駿

到溉

劉顯

劉之遴

弟之亨

許懋

列傳第三十五

梁書四十一

王規

劉毅

宗慄

王承

楮翔

蕭介

從父兄洽

楮球

劉孺

弟覽遵

劉潛

弟孝勝

孝威

孝先

殷芒

蕭幾

列傳第三十六

梁書四十二

臧盾

弟厥

傳岐

列傳第三十七

梁書四十三

韋粲

江子一

弟子四子五

張嶷

沈浚

柳敬禮

列傳第三十八

梁書四十四

太宗十一王

哀太子大器

南郡王大連

潯陽王大心

南海王大臨

安陸王大春

瀏陽公大雅

新興王大壯

西陽王大鈞

武寧王大威

建平王大球

義安王大昕

綏建王大摯

世祖二子

忠壯世子方等 貞惠世子方諸

列傳第三十九

梁書四十五

王僧辯

列傳第四十

梁書四十六

胡僧祐

徐文盛

杜崩

兄岸弟幼安
兄子龕

陰子春

列傳第四十一

孝行

梁書四十七

滕曇恭

沈崇僚

荀匠

庾黔婁

吉玢

甄恬

韓懷明

劉曇靜

何炯

庾沙彌

江綰

劉霽

褚脩

謝蘭

列傳第四十二

儒林

梁書四十八

伏曼容

何佟之

范縝

嚴植之

賀瑒

子華

司馬筠

卞華

崔靈恩

孔僉

盧廣

沈峻

太史叔明

孔子祛

皇侶

列傳第四十三

文學上

梁書四十九

到沆

丘遲

劉苞

袁峻

庾於陵

弟肩吾

劉昭

何遜

鍾嶸

周興嗣

吳均

列傳第四十四

文學

梁書五十

劉峻

劉沼

謝幾卿

劉勰

王籍

何思澄

劉杳

謝徵

臧嚴

伏挺

庾仲容

陸雲公

任孝恭

顏協

列傳第四十五

梁書五十二

何點

弟胤

阮孝緒

陶弘景

諸葛璩

沈顗

劉惠裴

范元琰

劉訐

劉歊

庾詵

張孝秀

庾承先

列傳第四十六

止足

梁書五十二

顧憲之

陶季直

蕭眎素

列傳第四十七

良吏

梁書五十三

庾革

沈瑀

范述曾

丘仲孚

孫謙

伏暉

何遠

列傳第四十八

諸夷

梁書五十四

海南

東夷

西北諸戎

列傳第四十九

梁書五十五

豫章王綜

武陵王紀

臨賀王正德

河東王譽

列傳第五十

侯景

紀第一

梁書一

散騎常侍姚

思廉

撰

武帝上

高祖武皇帝諱衍字叔達小字練兒南蘭陵中都里人漢相國何之後也何生鄼定侯延延生侍中彪彪生公府掾章章生皓皓生仰仰生太傅望之望之生光祿大夫育育生御史中丞紹紹生光祿勳閔閔生濟陰太守闡闡生吳郡太守冰冰生中山相苞苞生博士周周生虵丘長

矯矯生州從事達達生孝廉休休生廣陵郡丞
豹豹生太中大夫裔裔生淮陰令整整生濟陰
太守鏐鏐生州治中副子副子生南臺治書道
賜道賜生皇考諱順之齊高帝族弟也參預佐
命封臨湘縣侯歷官侍中衛尉太子詹事領軍
將軍丹陽尹贈鎮北將軍高祖以宋孝武大明
八年甲辰歲生于秣陵縣同夏里三橋宅生而
有奇異兩髀駢骨頂上隆起有文在右手曰武
帝及長博學多通好籌略有文武才幹時流名

輩咸推許焉所居室常若雲氣人或過者體輒
肅然起家巴陵王南中郎法曹行參軍遷衛將
軍王儉東閣祭酒儉一見深相器異謂廬江何
憲曰此蕭郎三十內當作侍中出此則貴不可
言竟陵王子良開西邸招文學高祖與沈約謝
朓王融蕭琛范雲任昉陸倕等竝遊焉號曰八
友融俊爽識鑒過人尤敬異高祖每謂所親曰
宰制天下必在此人累遷隨王鎮西諮議參軍
尋以皇考艱去職隆昌初明帝輔政起高祖爲

寧朔將軍鎮壽春服闋除太子庶子給事黃門
侍郎入直殿省預蕭詵等定策勲封建陽縣男
邑三百戶建武二年魏遣將劉昶王肅帥衆寇
司州以高祖爲冠軍將軍軍主隸江州刺史王
廣爲援距義陽百餘里衆以魏軍盛趙趙莫敢
前高祖請爲先啓廣即分麾下精兵配高祖
爾夜便進去魏軍數里逕上賢首山魏軍不測
多少未敢逼黎明城內見援至因出軍攻魏柵
高祖帥所領自外進戰魏軍表裏受敵乃弃重

圍退走軍罷以高祖爲右軍晉安王司馬淮陵
太守還爲太子中庶子領羽林監頃之出鎮石
頭四年魏帝自率大衆寇雍州明帝令高祖赴
援十月至襄陽詔又遣左民尚書崔慧景摠督
諸軍高祖及雍州刺史曹武等並受節度明年
三月慧景與高祖進行鄧城魏主帥十萬餘騎
奄至慧景失色欲引退高祖固止之不從乃狼
狽自拔魏騎乘之於是大敗高祖獨帥衆距戰
殺數十百人魏騎稍却因得結陣斷後至夕得

下船慧景軍死傷略盡惟高祖全師而歸俄以
高祖行雍州府事七月仍授持節都督雍梁南
北秦四州郢州之竟陵司州之隨郡諸軍事輔
國將軍雍州刺史其月明帝崩東昏即位揚州
刺史始安王遙光尚書令徐孝嗣尚書右僕射
江柘右將軍蕭坦之侍中江祀衛尉劉暄更直
內省分日帖敕高祖聞之謂從舅張弘策曰政
出多門亂其階矣詩云一國三公吾誰適從況
今有六而可得乎嫌隙若成方相誅滅當今避

禍惟有此地勤行仁義可坐作西伯但諸弟在
都恐罹世患須與益州圖之耳時高祖長兄懿
罷益州還仍行郢州事乃使弘策詣郢陳計於
懿曰昔晉惠庸主諸王爭權遂內難九興外寇
三作今六貴爭權人握王憲制主畫敕各欲專
威睚眦成憾理相屠滅且嗣主在東宮本無令
譽媒近左右蜂目忍人一總萬機恣其所欲豈
肯虛坐主諾委政朝臣積相嫌貳必大誅戮始
安欲爲趙倫形迹已見蹇人上天信無此理且

性甚猜狹徒取亂機所可當軸惟有江劉而已
拓怯而無斷暄弱而不才折鼎覆餗翹足可待
蕭坦之曾懷猜忌動言相傷徐孝嗣才非柱石
聽人穿鼻若隙開豐起必中外土崩今得守外
藩幸圖身計智者見機不俟終日及今猜防未
生宜召諸弟以時聚集後相防疑拔足無路郢
州控帶荆湘西注漢沔雍州士馬呼吸數萬獸
眦其閒以觀天下代化則竭誠本朝時亂則爲
國翦暴可得與時進退此蓋萬全之策如不早

圖悔無及也懿聞之變色心弗之許弘策還高
祖乃啓迎弟偉及憺是歲至襄陽於是潛造器
械多伐竹木沈於檀溪密爲舟裝之備時所住
齊常有五色回轉狀若蟠龍其上紫氣騰起形
如繖蓋望者莫不異焉永元二年冬懿被害信
至高祖密召長史王茂中兵呂僧珍別駕柳慶
遠功曹史吉士瞻等謀之既定以十一月乙巳
召僚佐集於廳事謂曰昔武王會孟津皆曰紂
可伐今昏主惡稔窮虐極暴誅戮朝賢罕有遺

育生人塗炭天命殛之卿等同心疾惡共興義
舉公侯將相良在茲日各盡勲効我不食言是
日建牙於是收集得甲士萬餘人馬千餘匹船
三千艘出檀溪竹木裝艦先是東昏以劉山陽
爲巴陵太守配精兵三千使過荊州就行事蕭
穎胄以襲襄陽高祖知其謀乃遣參軍王天獸
龐慶國詣江陵遍與州府書及山陽西上高祖
謂諸將曰荊州本畏襄陽人如脣亡齒寒自有
傷弦之急寧不闇同邪我若總荆雍之兵掃定

東夏韓白重出不能爲計況以無筭之昏主役
御刀應敕之徒哉我能使山陽至荆便即授首
諸君試觀何如及山陽至巴陵高祖復令天獸
齎書與穎川兄弟去後高祖謂張弘策曰夫用
兵之道攻心爲上攻城次之心戰爲上兵戰次
之今日是也近遣天獸往州府人皆有書今段
乘驛甚急止有兩封與行事兄弟云天獸口具
及問天獸而口無所說行事不得相聞不容妄
有所道天獸是行事心脅彼聞必謂行事與天

獸共隱其事則人人生疑山陽惑於衆口判相
嫌貳則行事進退無以自明必漏吾謀內是馳
兩空函定一州矣山陽至江安聞之果疑不上
穎胄大懼乃斬天獸送首山陽山陽信之將數
十人馳入穎胄伏甲斬之送首高祖仍以南康
王尊號之議來告且曰時月未利當須來年二
月遽便進兵恐非廟筭高祖答曰今坐甲十萬
糧用自竭況所藉義心一時驍銳事事相接猶
恐疑息若頓兵十旬必生悔吝童兒立異便大

事不成今太白出西方杖義而動天時人謀有
何不利處分已定安可中息昔武王伐紂行逆
太歲復須待年月乎竟陵太守曹景宗遣杜思
沖勸高祖迎南康王都襄陽待正尊號然後進
軍高祖不從王茂又私於張弘策曰我奉事節
下義無進退然今者以南康置人手中彼便挾
天子以令諸侯而節下前去爲人所使此豈歲
寒之計弘策言之高祖曰若使前途大事不捷
故自蘭艾同焚若功業克建威龍圖海號令天

下誰敢不從豈是碌碌受人處分待至石城當
面曉王茂曹景宗也於河南立新野郡以集新
附三年二月南康王爲相國以高祖爲征東將
軍給鼓吹一部戊申高祖發襄陽留弟偉守襄
陽城總州府事弟憺守壘城府司馬莊丘黑守
樊城功曹史吉士詢兼長史白馬戎主黃嗣祖
兼司馬郡令杜永兼別駕小府錄事郭儼知轉
漕移檄京邑曰夫道不常夷時無永化險秦相
公晦明非一皆屯困而後亨資多難以啓聖故

昌邑悖德孝宣聿興海西亂政簡文外歷竝拓
緒開基紹隆寶命理驗前經事昭往策獨夫擾
亂天常毀弃君德姦回淫縱歲月滋甚挺虐於
髡剪之年植險於髡卅之日猜忌凶毒觸途而
著暴戾昏荒與事而發自大行告漸喜容前見
梓宮在殯覲無哀色懽娛遊宴有過平常奇服
異衣更極誇麗至於選采妃嬪姊妹無別招待
巾櫛姑姪莫辨掖庭有裨販之名姬姜被干父
之服至乃形體宜露褻衣顛倒斬斮其間以爲

懽笑騁肆淫放驅屏郊邑老弱波流士女塗炭
行產盈路輿尸音道母不及抱子不遑哭劫掠
剽虜以日繼夜晝伏宵遊曾無休息淫酗營肆
酣歌壚邱寵恣愚堅亂惑妖孽梅蟲兒茹法珍
臧獲廝小專制威柄誅翦忠良屠滅卿宰劉鎮
軍舅氏之尊盡忠奉國江僕射外戚之重竭誠
事上蕭領軍葭莩之宗志存柱石徐司空沈僕
射搢紳冠冕人望攸歸或渭陽餘威或動庸允
穆或誠著艱難或劬勞王室竝受遺託同參顧

命送往事居俱竭心力宜其慶溢當年祚隆後
裔而一朝齋粉孩稚無遣人神怨結行路嗟憤
蕭令君忠公幹代誠貫幽顯往年寇賊遊魂南
鄭危逼拔刃飛泉孤城獨振及中流逆命憑陵
京邑謀猷禁省指授羣帥剋翦鯨鯢清我王度
崔慧景竒鋒迅駭兵交象魏武力喪魂義夫奪
膽投名送款比屋交馳負糧景從愚智競赴復
誓旅江甸奮不顧身獎厲義徒電掩彊敵剋殲
大憝以固皇基功出桓文勲超伊呂而勞謙省

己事昭心迹功遂身退不祈榮滿敢賞未聞禍
酷造及預稟精靈孰不冤痛而羣孽放命蜂蠆
懷毒乃遣劉山陽驅扇逋逃招逼亡命潛圖
密構規見掩襲蕭右軍夏侯征虜忠斷夙舉義
形於色奇謀宏振應手梟懸天道禍淫罪不容
戮至於悖禮違教傷化虐人射天彈路比之猶
善刳胎斮脛方之非酷盡寓縣之竹未足紀其
過窮山澤之兔不能書其罪自草昧以來圖謀
所記昏君暴后未有若斯之甚者也旣人神乏

主宗稷隲危海內沸騰氓庶板蕩百姓懍懍如
崩厥角蒼生喁喁投足無地莫府荷眷前朝義
均休戚上懷委付之重下惟在原之痛豈可卧
薪引火坐觀傾覆至尊體自高宗特鍾慈寵明
竝日月粹昭靈神祥啓元龜符驗當璧作鎮陝
藩化流西夏謳歌收奉萬有樂推右軍蕭穎胄
征虜將軍夏侯詳竝同心翼戴即宮舊楚三靈
再朗九縣更新升平之運此焉復始康哉之盛
在乎茲日然帝德雖彰區宇大定元惡未黜天

邑猶梗仰稟宸規率前啓路即日遣冠軍晉陵
內史曹景宗等二十軍主長槩五萬驍騎爲羣
鷄視爭先龍驤竝驅步出橫江直指朱雀長史
冠軍將軍襄陽太守王茂率二十軍主戈船七
萬乘流電激推鋒扼險斜趣白城南中郎諮議
參軍軍主蕭偉等二十九軍主巨艦迅檣衝波
喧水旗鼓八萬焱集石頭南中郎諮議參軍軍
主蕭憺等四十二軍主熊羆之士甲楯十萬汎
波馳艤掩據新亭益州刺史劉季連梁州刺史

柳惔司州刺史王僧景魏興太守裴師仁上庸
太守韋叡新城太守崔僧季竝肅奉明詔罷行
天罰蜀漢果銳汭流而下淮汝勁勇望波逆驚
幕府總率貔貅驍勇百萬繕甲燕弧屯兵異馬
縱金沸地鳴鞞聒天霜鋒曜日朱旗絳厲方舟
千里駱驛係進蕭右軍訐謨上才兼資文武英
略峻遠執鈞匡世擁荆南之衆督四方之師宣
讚中權奉衛輿輦旌麾所指威稜無外龍驤獸
步竝集建業黜放愚狡均禮海昏廓清神甸掃

定京宇譬猶崩泰山而壓蟻壤決懸河而注燔
燼豈有不殄滅者哉今資斧所加止梅蟲兒茹
法珍而已諸君或世胄羽儀書勲王府皆俛眉
姦儻受制凶威若能因變立功轉禍爲福並誓
河岳求紆青紫若執迷不悟距逆王師大衆一
臨刑茲罔赦所謂火烈高原芝蘭同泯勉求多
福無貽後悔賞罰之科有如白水高祖至竟陵
命長史王茂與太守曹景宗爲前軍中兵參
軍張法安守竟陵城茂等至漢口輕兵濟江逼

郢城其刺史張沖置陣據石橋浦義師與戰不利軍主朱僧起死之諸將議欲併軍圍郢分兵以襲西陽武昌高祖曰漢口不闊一里箭道交至房僧寄以重兵固守爲郢城人掎角若悉衆前進賊必絕我軍後一朝爲阻則悔無所及今欲遣王曹諸軍濟江與荊州軍相會以逼賊壘吾自後圍魯山以通沔漢鄖城竟陵間粟方舟而下江陵湘中之兵連旗繼至糧食旣足士衆稍多圍守兩城不攻自拔天下之事卧取之耳諸

將皆曰善乃命王茂曹景宗帥衆濟岸進頓九里其日張沖出軍迎戰茂等邀擊大破之皆弃甲奔走荊州遣冠軍將軍鄧元起軍主王世興田安等數千人會大軍於夏首高祖築漢口城以守魯山命水軍主張惠紹朱思遠等遊遏江中絕郢魯二城信使三月乃命元起進據南堂西渚田安之頓城北王世興頓曲水故城是時張沖死其衆復推軍主薛元嗣及沖長史程茂爲主乙巳南康王即帝位於江陵改永元三年

爲中興元年遷廢東昏爲涪陵王以高祖爲尚
書左僕射加征東大將軍都督征討諸軍事假
黃鉞西臺又遣冠軍將軍蕭穎達領兵會于
軍是日元嗣軍主沈難當率輕舸數千亂流來
戰張惠紹等擊破盡擒之四月高祖出沔命王
茂蕭穎達等進軍逼郢城元嗣戰頗疲因不敢
出諸將欲攻之高祖不許五月東昏遣寧朔將
軍吳子陽軍主光子衿等十三軍救郢州進據
巴口六月西臺遣衛尉席闡文勞軍齊蕭穎胃

等議謂高祖曰今頓兵兩岸不併軍圍郢定西陽武昌取江州此機已失莫若請救於魏與北連和猶爲上策高祖謂闡文曰漢口路通荆雍控引秦梁糧運資儲聽此氣息所以兵厭漢口連給數州今若併軍圍城又分兵前進魯山必阻沔路所謂搔喉若糧運不通自然離散何謂持久鄧元起近欲以三千兵往定尋陽彼若懼然悟機一酈生亦足脫距王師故非三千能下進退無據未見其可西陽武昌取便得耳得便

應鎮守兩城不減萬人糧儲稱是卒無所出
脫賊軍有上者萬人攻一城兩城勢不得相救
若我分軍應援則首尾俱弱如其不遣孤城必
陷一城既沒諸城相次土崩天下大事於是去
矣若郢州既拔席卷汭流西陽武昌自然風靡
何遽分兵散衆自貽其憂且丈夫舉動言靜天
步況擁數州之兵以誅羣豎懸河注火奚有不
滅豈容北面請救以自示弱彼未必能信徒貽
我醜聲此之下計何謂上策卿爲我白鎮軍前

途攻取但以見付事在目中無患不捷恃鎮軍
靖鎮之耳吳子陽等進軍武口高祖乃命軍主
梁天惠蔡道祐據漁湖城唐脩期劉道曼屯白
陽壘夾兩岸而待之子陽又進據加湖去郢三
十里傍山帶水築壘柵以自固魯山城主房僧
寄死衆復推助防張樂祖代之七月高祖命王
茂帥軍主曹仲宗康絢武會超等潛師襲加湖
將逼子陽水涸不通艦其夜暴長衆軍乘流齊
進鼓噪攻之賊俄而大潰子陽等竄走衆盡溺

于江王茂虜其餘而旋於是郢魯二城相視奪
氣先是東昏遣冠軍將軍陳伯之鎮江州爲子陽
等聲援高祖乃謂諸將曰夫征討未必須實
力所聽威聲耳今加湖之敗誰不弭服陳獸牙
即伯之子狼狽奔歸彼間人情理當恐懼我謂
九江傳檄可定也因命搜所獲俘囚得伯之幢
主蘇隆之厚加賞賜使致命焉魯山城主張樂
祖郢城主程茂薛元嗣相繼請降初郢城之閉
將佐文武男女口十餘萬人疾疫流腫死者十

七八及城開高祖竝加隱卹其死者命給棺槨
先是汝南人胡文超起義於潯陽求討義陽安
陸等郡以自効高祖又遣軍主唐脩期攻隨
郡竝克之司州刺史王僧景遣子貞孫入質司
部悉平陳伯之遣蘇隆之反命求未便進軍高
祖曰伯之此言意懷首鼠及其猶豫急往逼之
計無所出勢不得暴乃命鄧元起率衆即日沿
流八月天子遣黃門郎蘇回勞軍高祖登舟命
諸將以次進路留上庸太守韋叡守郢城行州

事鄧元起將至尋陽陳伯之猶猜懼乃收兵退保湖口留其子獸牙守盆城及高祖至乃束甲請罪九月天子詔高祖平定東夏竝以便宜從事是月留少府長史鄭紹叔守江州城前軍次蕪湖南豫州刺史申胄奔姑熟走至是時大軍進據之仍遣曹景宗蕭穎達領馬步進頓江寧東昏遣征虜將軍李居士率步軍迎戰景宗擊走之於是王茂鄧元起呂僧珍進據赤鼻邏曹景宗陳伯之爲遊兵是日新亭城主江道

林率兵出戰衆軍擒之於陣大軍次新林命王
茂進據越城曹景宗據皂莢橋鄧元起據道士
墩陳伯之據籬門道林餘衆退屯航南義軍迫
之因復散走退保朱爵憑淮以自固時李居士
猶據新亭壘請東昏燒南岸邑屋以開戰場自
大航以西新亭以北蕩然矣十月東昏石頭軍
主朱僧勇率水軍二千人歸降東昏又遣征虜
將軍王珍國率軍主胡獸牙等列陣於航南大
路悉配精手利器尚十餘萬人闔人王張子持

白虎幡督率諸軍又開航背水以絕歸路王茂
曹景宗等犄角奔之將士皆殊死戰無不一當
百鼓噪震天地珍國之衆一時土崩投淮死者
積尸與航等後至者乘之以濟於是朱爵諸軍
望之皆潰義軍追至宣陽門李居士以新亭壘
徐元瑜以東府城降石頭白下諸軍並宵潰壬
午高祖鎮石頭命衆軍圍六門東昏悉焚燒門
內驅逼營署官府並入城有衆二十萬青州刺
史桓和給東昏出戰因以其衆來降高祖命諸

軍築長圍初義師之逼東昏遣軍主左僧慶鎮

京口常僧景鎮廣陵李叔獻屯瓜步及申胄自

姑孰奔歸又使屯破墩以爲東北聲援至是高

祖遣使曉喻並率衆降乃遣弟輔國將軍秀

鎮京口輔國將軍恢屯破墩從弟寧朔將軍景

鎮廣陵吳郡太守蔡寅弃郡赴義師十二月景

寅旦兼衛尉張稷北徐州刺史王珍國斬東昏

送首義師高祖命呂僧珍勒兵封府庫及圖籍

收孽妾潘妃及凶黨王咥之以下四十人屬吏

誅之宣德皇后令廢涪陵王爲東昏侯依漢海
昏侯故事授高祖中書監都督揚南徐二州諸
軍事大司馬錄尚書驃騎大將軍楊州刺史封
建安郡公食邑萬戶給班劍四十人黃鉞侍中
征討諸軍事並如故依晉武陵王遵承制故
事己卯高祖入屯閱武堂下令曰皇家不造遘
此昏凶禍挺動植虐被人鬼社廟之危蠢焉如
綴吾身籍皇宗曲荷先顧受任邊疆推轂萬里
眷言瞻烏痛心在目故率其尊主之情厲其志

生之志雖寶曆重升明命有紹而獨夫醜縱方
燭京邑投袂援戈克弭多難虐政橫流爲日既
久同惡相濟諒非一族仰稟朝命任在專征思
播皇澤被之率土凡厥負豐咸與惟新可大赦
天下唯王咍之等四十一人不在赦例又令曰夫
樹以司牧非役物以養生視人如傷豈肆上以
縱虐廢主弃常自絕宗廟窮凶極悖書契未有
征賦不一苛酷滋章緹繡土木菽粟犬馬徵發
閭左以充繕築流離寒暑繼以疫癘轉死溝渠

曾莫救恤朽肉枯骸烏鳶是厭加以天災人火
屢焚宮掖官府臺寺尺椽無遺悲甚黍離痛兼
麥秀遂使億兆離心疆徼侵弱斯人何辜離此
塗炭今明昏遞運大道公行思治之氓來蘇茲
日猥以寡薄屬當大寵雖運距中興艱同草昧
思闡皇休與之更始凡昏制謬賦淫刑濫役外
可詳檢前源悉皆除蕩其主守散失諸所損耗
精立科條咸從原例又曰永元之季乾維落紐
政實多門有殊衛文之代權移於下事等曹恭

之時遂使閹尹有翁媼之稱高安有法堯之旨
鬻獄販官錮山護澤開塞之機奏成小醜直道
正義擁抑彌年懷冤抱理莫知誰訴姦吏因之
筆削自己豈直賈生流涕許伯哭時而已哉今
理運惟新政刑得所矯革流弊實在茲日可通
檢尚書衆曹東昏時諸諍訟失理及主者淹停
不時施行者精加評辨依事議奏又下令以義
師臨陣致命及疾病死亡者竝加葬斂收恤遺
孤又令曰朱爵之捷逆徒迭死者特許家人殯

葬若無親屬或有貧苦二縣長尉即爲埋掩建
康城內不達天命自取淪滅亦同此科二年正
月天子遣兼侍中席闡文兼黃門侍郎樂法才
慰勞京邑追贈高祖祖散騎常侍左光祿大夫
考侍中丞相高祖下令曰夫在上化下草偃風
從世之澆淳恒由此作自永元失德書契未紀
窮凶極悖焉可勝言旣而璇室外構傾宮內積
奇技異服殫所未見上慢下暴淫侈競馳國命
朝權政移近習販官鬻爵賄貨公行並甲第康

衢漸臺廣室長袖低昂等和戎之賜珍羞百品
同伐冰之家愚人因之侵以成俗驕豔競爽夸
麗相高至乃市井之家貂狐在御工商之子緹
繡是襲日入之次夜分未反昧爽之朝期之清
旦聖明肇運厲精惟始雖曰纘戎殆同創革且
淫費之後繼以興師巨橋鹿臺凋罄不一孤忝
荷大寵務在澄清思所以仰述皇朝大帛之旨
俯厲微躬鹿裘之義解而更張斲雕爲樸自非
可以奉采盛脩絃冕習禮樂之容繕甲兵之備

此外衆費一皆禁絕御府中署量宜罷省掖庭
備御妾之數太子絕鄭衛之音其中有可以率
先卿士准的昉庶菲食薄衣請自孤始加羣才
竝軌九官咸事若能人務退食競存約己移風
易俗庶朞月有成昔毛玠在朝士大夫不敢靡
衣偷食魏武歎曰孤之法不如毛尚書孤雖德
謝往賢任重先達實望多士得其此心外可詳
爲條格戊戌宣德皇后臨朝入居內殿拜帝大
司馬解承制百僚致敬如前詔進高祖都督中

外諸軍事劔履上殿入朝不趨贊拜不名加前
後部羽葆鼓吹置左右長史司馬從事中郎掾
屬各四人竝依舊辟士餘竝如故詔曰夫日月
麗天高明所以表德山岳題地柔博所以成功
故能庶物出而資始河海振而不洩二象貞觀
代之者人是以七輔四叔致無爲於軒昊韋彭
齊晉靖衰亂於殷周大司馬收縱自天體茲齊
聖文洽九功武苞七德欽惟厥始徽猷早樹誠
箸艱難功參帷幙錫賦開壤式表厥庸建武升

歷邊隙屢啓公釋書輟講經營四方司豫懸切
樊漢危殆覆彊寇於沔濱僵胡馬於鄧汭永元
肇號難結群醜專威擅虐毒被含靈溥天惴惴
命懸剋刻无終有期神謨載挺首建大策惟新
鼎祚投袂勤王公流電舉魯城雲撤夏汭露披
加湖群盜一鼓殄拔姑熟連旂倏焉冰泮取新
壘其如拾芥撲朱爵其猶掃塵霆電外駭省闈
內傾餘醜纖蠹蟻必盡援彼已溺解此倒懸
塗權里抃自近及遠畿甸夷穆方外肅寧解茲

虐網被以寬政積弊窮昏一朝載廓聲教遐漸
無思不被雖伊尹之執茲壹德姬旦之光于四
海方斯蔑如也昔呂望翼佐聖君猶享西履之
命文侯立功平后尚荷二弓之錫況於盛德元
勲超邁自古黔首懍懍待以爲命救其已然拯
其方斲式閭表墓未或能比而大輅渠門輟而
莫授眷言前訓無忘終食便宜敬升大典式允
群望其進位相國總百揆揚州刺史封十郡爲
梁公備九錫之禮加璽紱遠遊冠位在諸王上

加相國綠綬綬其驃騎大將軍如故依舊置梁
百司策曰二儀寂寞由寒暑而代行三才並用
資立人以爲寶故能流形品物仰代天工允茲
元輔應期挺秀裁成天地之功幽協神明之德
撥亂反正濟俗寧人盛烈光於有道大勲振於
無外雖伊陟之保乂王家姬公之有此丕訓方
之蔑如也今將授公典策其勛聽朕命上天不
造難鍾皇室元帝以休明早崩簡文以仁弱不
嗣高宗襲統宸居弗永雖夙夜劬勞而隆平不

治嗣君昏暴書契弗覩朝權國柄委之群孽勦
戮忠賢誅殘台輔含冤抱痛噍類靡餘寔繁非
一竝專國命嘖笑致災眚眦及禍嚴科毒賦載
離比屋溥天熬熬實身無所冤頸引決道樹相
望無近無遠號天靡告公藉昏明之期因北人
之願援帥聖后翊成中興宗社之危已固天人
之望允塞此實公紉我絕綱大造皇家者也永
明季年邊隙大啓荆河連率招引戎荒江淮擾
逼勢同履虎公受言本朝輕兵赴襲縻以長筭

制之環中排危冒險彊柔遞用坦然一方還成
藩服此又公之功也在昔隆昌洪基已謝高宗
慮深社稷將行權道公定策帷帳激揚大節廢
帝立王謀猷深箸此又公之功也建武闡業厥
猷雖遠戎狄內侵憑陵關塞司部危逼淪陷指
期公治兵外討卷甲長騫接距交綏電激風掃
摧堅覆銳咽水塗原執俘象魏獻馘海渚焚廬
毀帳號哭言歸此又公之功也樊漢貼切羽書
續至公星言鞠旅稟命徂征而軍機戎統事非

己出善策嘉謀抑而莫允鄧城之役胡馬卒至
元帥潛及不相告報弃甲捐師餌之虎口公南
收散卒北禦雕騎全衆方軌案路徐歸拯我邊
危重獲安堵此又公之功也漢南迴弱咫尺勅
寇兵糧蓋闕器甲靡遺公作藩爰始因資靡託
整兵訓卒蒐狩有序俾我危城翻爲彊鎮此又
公之功也永元紀號瞻烏已及雖廢昏有典而
伊霍稱難公首建大策爰立明聖義踰邑綸勲
高代入易亂以化俾昏作明此又公之功也文

王之風雖被江漢京邑蠢動湮爲洪流句吳於
越巢幕匪喻公投袂萬里事惟拯溺義聲所覃
無思不韙此又公之功也魯城夏汭梗據中流
乘山置壘縈川自固公御此烏集陵茲地險頓
兵坐甲寒往暑移我行永久士忘歸願經以遠
圖御以長策費無遺矢戰未窮兵踐華之固相
望俱拔此又公之功也惟此羣凶同惡相濟緣
江負險蟻聚加湖水陸盤據規援夏首桴旂一
臨應時褫潰此又公之功也茲孽震皇復懷舉

斧蓄兵九派用擬勤王公稜威直指勢踰風電
旌旆未臨全州稽服此又公之功也姑熟衝要
密邇京畿凶徒熾聚斷塞津路公偏師啓塗排
方繼及兵威所震望旗自駭焚舟委壁卷甲宵
遁此又公之功也羣豎猖狂志在借一豕突淮
涘武騎如雲公爰命英勇因機騁銳氣冠版泉
勢踰洄水追奔逐北奄有通津熊耳比峻未足
云擬睢水不流曷其能及此又公之功也琅邪
首襟帶岨固新壘東壩金湯是埒憑險作守

兵食兼資風激電駭莫不震疊城復于隍於是
乎在此又公之功也獨夫昏很憑城靡懼鼓鍾
鞀鞀傲若有餘狎是邪孽怠斯冠冕凶狡因之
將逞孥戮公竒謨密運盛略潛通忠勇之徒得
申厥効白旗宣室未之或比此又公之功也公有
拯億兆之勲重之以明德爰初厲志服道儒門
濯纓來仕清猷映代時運艱難宗社危殆岷崗
已燎玉石同焚驅率貔貅抑揚霆電義等南巢
功齊牧野若夫禹功寂漠微管誰嗣拯其將魚

驅其被髮解茲亂網理此焚絲復禮衽席反樂
河海永平故事聞之者歎息司隸舊章見之者
隕涕請我民命還之斗極憫憫搢紳重荷戴天
之慶哀哀黔首復蒙履地之恩德踰嵩岱功隣
造物超哉邈矣越無得而言焉朕又聞之疇庸
命德建侯作屏咸用剋固四維永隆萬葉是以
二南流化九伯斯征王道淳洽刑措罔用覆政
弗興歷茲永久如燬旣及晉鄭靡依惟公經綸
天地寧濟區夏道冠乎伊稷賞薄於桓文豈所

以憲章齊魯長轡宇宙敬惟前列朕甚懼焉今
進授相國改揚州刺史爲牧以豫州之梁郡歷
陽南徐州之義興揚州之淮南宣城吳興會稽
新安東陽十郡封公爲梁公錫茲白土苴以白
茅爰定爾邦用建冢社在昔旦奭入居保佑逮
于畢毛亦作卿士任兼內外禮實宜之今命使
持節兼太尉王亮授相國揚州牧印綬梁公璽
紱使持節兼司空王志授梁公茅土金虎符第
一至第五左竹使符第一至第十左相國位冠

羣后任總百司恒典彝數宜與事革其以相國
總百揆去錄尚書之號上所假節侍中貂蟬中
書監印中外都督大司馬印綬建安公印策驃
騎大將軍如故又加公允錫其敬聽後命以公
禮律兼修刑德備舉哀矜折獄罔不用情是用
錫公大輅戎輅各一玄牡二駟公勞心稼穡念
在人天丕崇本務惟穀是寶是用錫公袞冕之
服赤舄副焉公鏐鈞所被變風以雅易俗陶民
載和邦國是用錫公軒懸之樂六佾之舞公文

德廣覃義聲遠洽椎髻髻首夷歌請吏是用
錫公朱戶以居公揚清抑濁官方有序多士聿
興棫樸流詠是用錫公納陛以登公正色御下
以身軌物式遏不虞折衝惟遠是用錫公虎賁
之士三百人公威同夏日志清蕪宥放命圮族刑
茲罔赦是用錫公鈇鉞各一公跨躡嵩溟陵厲
區宇譬諸日月容光必至是用錫公彤弓一彤
矢百盧弓十盧矢千公永言惟孝至感通神恭
嚴祀典祭有餘勛是用錫公秬鬯一卣圭瓚副

焉梁國置丞相以下一遵舊式欽哉其敬循往
策祗服大禮對揚天眷用膺多福以弘我太祖
之休命高祖固辭府僚勸進曰伏承嘉命顯至
佇策明公逡巡盛禮斯實謙尊之旨未窮遠大
之致何者嗣君弃常自絕宗社國命人主翦爲
仇讎折棟崩榱壓焉自及卿士懷脯斲之痛黔
首懼比屋之誅明公亮格天之功拯水火之切
再蠲日月重綴參辰反龜玉於塗泥濟斯民於
阡岸使夫匹婦二兒羞言伊呂鄉校里塾恥談

五霸而位卑乎阿衡地狹於曲阜慶賞之道尚
其未洽夫大寶公器非要非距至公至平當仁
誰讓明公宜祇奉天人允膺大禮無使後予之
歌同彼胥怨兼濟之人翻爲獨善公不許二月
辛酉府僚重請曰近以朝命蘊策冒奏丹誠奉
被還令未蒙虛受搢紳顙顙深所未達蓋聞受
金於府通人弘致高蹈海隅匹夫小節是以履
乘石而周公不以爲疑贈玉璜而太公不以爲
讓況代哲繼軌先德在人經綸草昧歎深微管

加以朱方之役荆河是依班師振旅大造臺閣
雖復累繭救宋重祗存楚居今觀古曾何足云
而惑甚盜鍾功疑不賞皇天后土不勝其酷是
以王馬駿奔表微子之去金板出地告龍逢之冤
明公據鞍輟哭厲三軍之志獨居掩涕激義士
之心故能使海若登祗罄圖効祉山戎孤竹束
馬景從伐罪弔人一匡靜亂匪叨天功實勤濡
足且明公本自諸生取樂名教道風素論坐鎮雅
俗不習孫吳邁茲神武驅盡誅之氓濟必封之

俗龜玉不毀誰之功與獨爲君子將使伊周何地於是始受相國梁公之命是日焚東昏淫奢異服六十二種於都街湘東王寶暉謀反賜死詔追贈梁公故夫人爲梁妃乙丑南充州隊主陳文興於桓城內鑿井得玉鏤麒麟金鏤玉璧水精環各二枚又建康令羊瞻解稱鳳皇見縣之桐下里宣德皇后稱美符瑞歸于相國府景寅詔梁國初建宜須綜理可依舊選諸要職悉依天朝之制高祖上表曰臣聞以言取士士飾

其言以行取人人竭其行所謂才生於代窮達
惟時而風流遂往馳騫成俗媒孽夸衒利盡錐
刀遂使官人之門肩摩轂擊豈直暴蓋露冠不
避寒暑遂乃戢屨杖策風雨必至良由鄉舉里
選不師古始稱肉度骨遺之管庫加以山河梁
畢闕輿徵之恩金張許史忘舊業之替吁可傷
哉且夫譜牒訛誤詐僞多緒人物雅俗莫肯留
心是以冒襲良家即成冠族妄修邊幅便爲雅
士負俗深累遽遭寵擢墓木已拱方被徽榮故

前代選官皆立選簿應在貫魚自有銓次冑籍
升降行能臧否或素定懷抱或得之餘論故得
簡通賓客無事掃門頃代陵夷九流乖失其有
勇退忘進懷質抱真者選部或以未經朝謁難
於進用或有晦善藏聲自埋衡華又以名不素
著絕其階緒必須畫刺投狀然後彈冠則是驅
迫廉撝獎成澆競愚謂自今選曹宜精隱括依
舊立簿使冠屨無爽名實不違庶人識崖涖造
請自息且聞中間立格甲族以二十登仕後門

以過立試吏求之愚懷抑有未達何者設官分
職惟才是務若八元立年居阜隸而見抑四凶
弱冠處鼎族而宜甄是則世祿之富無意爲善
布衣之士肆心爲惡豈所以弘獎風流希向後
進此實巨蠹尤宜刊革不然將使周人有路傍
之泣晉臣興漁獵之歎且俗長浮競人寡退情
若限歲登朝必增年就宦故貌實昏童籍已踰
立滓穢名教於斯爲甚臣總司內外憂責是任
朝政得失義不容隱伏願陛下垂聖淑之姿降

聽覽之末則彝倫自穆憲章惟允詔依高祖表
施行景戌詔曰嵩高惟岳配天所以流稱大啓
南陽霸德所以光闡忠誠簡帝番君膺上爵之
尊勤勞王室姬公增附庸之地前王令典布諸
方策長祚字眊罔不由此相國梁公體茲上哲
齊聖廣淵文教內洽武功外暢推轂作藩則威
懷被於殊俗治兵教戰則霆雷赫於萬里道喪
時昏讒邪孔熾豈徒宗社如綴神器莫主而已
哉至於兆庶殲亡衣冠殄滅餘類殘喘指命崇

朝含生業業投足無所遂乃山川反覆草木塗
地與夫仁被行葦之時信及豚魚之日何其遼
叟相去之遠歟公命師鞠旅指景長騫而本朝
危切樊鄧遐遠凶徒磐據水陸相望爰自姑熟
屆于夏首嚴城勁卒憑川爲固公治漢浮江電
激風掃舟徒水覆地險雲傾藉茲義勇前無彊
陣拯危京邑清我帝畿撲既燎於原火免將誅
於比屋悠悠非庶命不在天茫茫六合咸受其
賜匡俗正本人不失職仁信竝行禮樂同暢伊

周末足方軌桓文遠有勲德而爵後藩牧地終
秦楚非所以式酬光烈允答元勲寔由公履謙
爲本形於造次嘉數耒申晦朔增佇便宜崇斯
禮秩允副遐邇之望可進梁公爵爲王以豫州
之南譙廬江江州之尋陽郢州之武昌西陽南
徐州之南琅邪南東海晉陵揚州之臨海永嘉
十郡益梁國并前爲二十郡其相國揚州牧驃
騎大將軍如故公固辭有詔斷表相國左長史
王瑩等率百僚敦請三月辛卯延陵縣華陽羅

主戴車牒稱云十二月乙酉甘露降茅山彌漫
數里正月己酉邏將潘道蓋於山石穴中得毛
龜二月辛酉邏將徐靈符又於山東見白麋
一景寅平旦山上雲霧四合須臾有玄黃之色
狀如龍形長十餘丈乍隱乍顯又乃從西北升
天丁卯兗州刺史馬元和籤所領東平郡壽張
縣見騶虞一癸巳受梁王之命令曰孤以虛昧
任執國鈞雖夙夜勤止念在興治而育德振民
邈然尚遠聖朝永言舊式隆此眷命侯伯盛典

方軌前列嘉錫隆被禮數昭崇徒守愿節終隔
體諒羣后百司重茲敦獎勉茲厚顏當此休祚
望昆彭以長想欽桓文而歎息思弘政塗莫知
津濟邦甸初啓藩宇惟新思覃嘉慶被之下
國國內殊死以下今月十五日昧爽以前一皆
原赦鰥寡孤獨不能自存者賜穀五斛府州所
統亦同蠲蕩景午命王冕十有二旒建天子旌
旗出警入蹕乘金根車駕六馬備五時副車置
旄頭雲罕樂舞八佾設鍾虞宮縣王妃王子王

女爵命之號一依舊儀景辰齊帝禪位于梁王
詔曰夫五德更始三正迭興馭物資賢登庸啓
聖故帝跡所以代昌王度所以改耀革晦以明
由來尚矣齊德淪微危亡荐襲隆昌凶虐寔違
天地永元昏暴取紊人神三光再沈七廟如綴
鼎業幾移含識知泯我高明之祚眇焉將墜永
惟屯難冰谷載懷相國梁王天誕睿哲神縱靈
武德格玄祗功均造物止宗社之橫流反生人
之塗炭扶傾頽構之下拯溺逝川之中九區重

緝四維更紐絕禮還紀崩樂復張文館盈紳戎
亭息警言浹海寓以馳風罄輪裳而稟朝八表呈
祥五靈効祉豈止鱗羽禎奇雲星瑞色而已哉
勲茂於百王道昭乎萬代固以明配上天光華
日月者也河嶽表革命之符圖讖紀代終之運
樂推之心幽顯共積誦頌之誠華裔同箸昔水
政旣微木德升緒天之曆數寔有所歸握鏡琬
樞允集明哲朕雖庸蔽闇于大道永鑒崇替爲
日已久敢忘列代之高義人祗之至願乎今便

敬禪于梁即安姑孰依唐虞晉宋故事四月辛酉宣德皇后令曰西詔至帝憲章前代敬禪神器于梁明可臨軒遣使恭授璽紱未亡人便歸于別宮壬戌策曰咨爾梁王惟昔遂古之載肇有生人皇雄大庾之辟赫胥尊虞之后斯竝龍圖鳥跡以前慌忽杳冥之世固無得而詳焉洎乎農軒炎皞之代放勛重華之主莫不以大道君萬姓公器御八紘居之如執朽索去之若捐重負一駕汾陽便有窅然之志暫適箕嶺即動

讓王之心故知戴黃屋服玉璽非所以示貴稱
尊乘大輅建旌旆蓋欲令歸趣有地是故忘已
而字非人殉物而君四海及於精華內竭奮擣
外勞則撫茲歸運惟能是與況兼乎笙管革文
威圖啓瑞攝提夜朗熒光晝發者哉四百告終
有漢所以高揖黃德旣謝魏氏所以樂推爰及
晉宋亦弘斯典我太祖握河受曆應符啓運二
葉重光三聖係軌嗣君喪德昏弃紀度毀紊天
綱凋絕地紐茫茫九域翦爲仇讎溥天相顧命

懸畧刻斷涉創孕於事已輕求雞徵杖曾何足
譬是以谷滿川枯山飛鬼哭七廟已危人神無
主惟王體茲上哲明聖在躬稟靈五緯明竝日
月彝倫攸序則端冕而協邕熙時難孔棘則推
鋒而拯涂炭功踰造物德濟蒼生澤無不漸仁
無不被上達蒼昊下及川泉文教與鵬翼齊舉
武功與日車竝運固以幽顯宅心謳訟斯屬豈
徒桴鼓播地卿雲叢天而已哉至如晝覩爭明
夜飛枉矢土淪彗刺日旣星亡除舊之徵必顯

更姓之符允集是以義師初踐芳露凝甘仁風
既被素文自擾北闕藁街之使風車火徼之民
膜拜稽首願爲臣妾鍾石畢變事表於遷虞蛟
魚竝出義彰於事夏若夫長人御衆爲之司牧
本同已於萬物乃因心於百姓寶命無常主帝
王非一族今仰祗乾象俯藉人願敬禪神器授
帝位于爾躬大祚告窮天祿永終於戲王允執
其中式遵前典以副昊天之望禋上帝而臨億
兆格文祖而膺大業以傳無疆之祚豈不盛歟

又爾書曰夫生者天地之大德人者含生之通
稱竝首同本未知所以異也而稟靈造化賢愚
之情不一託性五常彊柔之分或舛羣后靡
爭犯交興是故建君立長用相司牧非謂尊驕
在上以天下爲私者也兼以三正迭改五運相
遷綠文赤字徵河表洛在昔勛華深達茲義眷
求明哲授以蒸人遷虞夏本因心於百姓殷
化爲周實受命於蒼昊爰自漢魏罔不率由降
及晉宋亦遵斯典我高皇所以格文祖而撫歸

運畏上天而恭寶曆者也至平季世禍亂荐臻
王度紛糾燄燄積億兆夷人刀俎爲命已然
之逼若綫之危跼天躋地逃形無所羣凶狹煽
志逞殘戮將欲先殄衣冠次移龜鼎衡保周召
竝列宵人巢幕累卵方此非切自非英聖遠圖
仁爲己任則鳴梟厲吻翦翬焉已及惟王崇高則
天博厚儀地鎔鑄六合陶甄萬有鋒駟交馳振
靈武以遐略雲雷方扇鞠義旅以勤王揚旂旆
於遠路戮女姦於魏闕德冠往初功無與二弘

濟艱難緝熙王道懷柔萬姓經營四方舉直措
枉較如畫一待旦同乎殷后日昃過於周文風
化肅穆禮樂交暢加以赦過宥罪神武不殺盛
德昭於景緯至義感於鬼神若夫納彼大麓膺
此歸運烈風不迷樂推攸在治五隼於已亂重
九鼎於既輕自聲教所及車書所至革面回首
謳吟德澤九山滅稷四瀆安流祥風扇起淫雨
靜息玄甲遊於芳荃素文馴於郊苑躍九川於
清漢鳴六象於高崗靈瑞雜沓玄符昭著至於

星宇紫宮水効孟月飛鴻滿野長堦橫天取新
之應旣昭革故之徵必顯加以天表秀特軒狀
堯姿君臨之符諒非一揆書云天鑒厥德用集
大命詩云文王在上於昭于天所以二儀乃眷
幽明允叶豈惟宅是萬邦緝茲謳訟而已哉朕
是用擁琬沈首屬懷聖哲昔水行告厭我太祖
旣受命代終在日天祿云謝亦以木德而傳于
梁遠尋前典降惟近代百辟遐邇莫違朕心今
遣使持節兼太保侍中中書監兼尚書令汝南

縣開國侯亮兼太尉散騎常侍中書令新吳縣
開國侯志奉皇帝璽紱受終之禮一依唐虞故
事王其陟茲元后君臨萬方式傳洪烈以答上
天之休命高祖抗表陳讓表不獲通於是齊百
官豫章王元琳等八百一十九人及梁臺侍中
臣雲等一百一十七人竝上表勸進高祖謙讓
不受是日太史令蔣道秀陳天文符讖六十四
條事竝明箸羣臣重表固請乃從之

紀第二

梁書二

散騎常侍姚思廉撰

武帝中

天監元年夏四月景寅高祖即皇帝位於南郊
設壇柴燎告類于天曰皇帝臣諱敢用玄牡昭
告于皇天后帝齊氏以曆運斯旣禘終則享欽
若天應以命于諱夫任是司牧惟能是授天命
不于常帝王非一族唐謝虞受漢替魏升爰及
晉宋憲章在昔咸以君德馭四海元功子萬姓

故能大庇氓黎光宅區宇齊代云季世主昏凶
狡焉羣慝是崇是長肆厥姦回暴亂以播虐于
我有邦俾溥天惴惴將墜于深壑九服八荒之
內連率岳牧之君蹶角頓顙匡救無術卧薪待
然援天靡訴諱投袂星言推鋒萬里厲其掛冠
之情用拯兆民之切銜膽誓衆覆銳屠堅建立
人主克翦昏亂遂因時來宰司邦國濟民康世
實有厥勞而晷緯呈祥川岳効祉朝夕垌牧日
月郊畿代終之符旣顯革運之期已萃殊俗百

鑾重譯獻款人神遠邇罔不和會於是羣公卿
士咸致厥誠竝以皇乾降命難以謙拒齊帝脫
屣萬邦授以神器諱自惟匪德辭不獲許仰迫
上玄之睠俯惟億兆之心宸極不可久曠民神
不可乏主遂藉樂推膺此嘉祚以茲寡薄臨御
萬方顧求夙志永言祗惕敬簡元辰恭茲大禮
升壇受禪告類上帝克播休祉以弘盛烈式傳
厥後用永保于我有梁惟明靈是饗禮畢備法
駕即建康宮臨太極前殿詔曰五精遞襲皇王

所以受命四海樂推殷周所以改物雖禪代相
舛遭會異時而微明迭用其流遠矣莫不振民
育德光被黎元朕以寡闇命不先後寧濟之功
屬當期運乘此時來因心萬物遂振厥弛維大
造區夏永言前蹤義均勲德齊氏以代終有徵
歷數云改欽若前載集大命于朕躬顧惟菲德
辭不獲命寅畏上靈用應景業執禋柴之禮當
與能之祚繼迹百王君臨四海若涉大川罔知
攸濟洪基初兆萬品權輿思俾慶澤覃被率土

可大赦天下改齊中興二年爲天監元年賜民
爵二級文武加位二等鰥寡孤獨不能自存者
人穀五斛逋布口錢宿債勿復收其犯鄉論清
議贓汙淫盜一皆蕩滌洗除前注與之更始封
齊帝爲巴陵王全食一郡載天子旌旗乘五時
副車行齊正朔郊祀天地禮樂制度皆用齊典
齊宣德皇后爲齊文帝妃齊后王氏爲巴陵王
妃詔曰興運升降前代舊章齊世王侯封爵悉
皆降省其有效箸艱難者別有後命惟宋汝陰

王不在除例又詔曰大運肇升嘉慶惟始劫賊
餘口沒在臺府者悉可蠲放諸流徙之家竝聽
還本追尊皇考爲文皇帝廟曰太祖皇妣爲獻
皇后追諡妃郗氏爲德皇后追封兄太傅懿爲
長沙郡王諡曰宣武齊後軍諮議敷爲永陽郡
王諡曰昭弟齊太常暢爲衡陽郡王諡曰宣齊
給事黃門侍郎融爲桂陽郡王諡曰簡是日詔
封文武功臣新除車騎將軍夏侯詳等十五人
爲公侯食邑各有差以弟中護軍宏爲揚州刺

史封爲臨川郡王南徐州刺史秀安成郡王雍
州刺史偉建安郡王左衛將軍恢鄱陽郡王荆
州刺史憺始興郡王丁卯加領軍將軍王茂鎮
軍將軍以中書監王亮爲尚書令中軍將軍相
國左長史王瑩爲中書監撫軍將軍吏部尚書
沈約爲尚書僕射長兼侍中范雲爲散騎常
侍吏部尚書詔曰宋氏以來竝恣淫侈傾宮之
富遂盈數千推筭五都愁窮四海竝嬰罹冤橫
拘逼不一撫絃命管良家不被蠲織室繡房幽

厄猶見役弊國傷和莫斯爲甚凡後宮樂府西
解暴室諸如此例一皆放遣若衰老不能自存
官給廩食戊辰車騎將軍高句驪王高雲進號
車騎大將軍鎮東大將軍百濟王餘大進號征
東大將軍安西將軍宕昌王梁彌頡進號鎮西
將軍鎮東大將軍倭王武進號征東將軍鎮西
將軍河南王吐谷渾休留代進號征西將軍巴
陵王薨于姑孰追謚爲齊和帝終禮一依故事
己巳以光祿大夫張瓌爲右光祿大夫庚午鎮

南將軍江州刺史陳伯之進號征南將軍詔曰
觀風省俗哲后弘規狩岳巡方明王盛軌所以
重華在上五品聿脩文命肇基四載斯履故能
物色幽微耳目屠釣致王業於緝熙被淳風於
遐邇朕以寡薄昧于治方藉代終之運當符命
之重取監前古慄若馭朽思所以振民育德去
殺勝殘解網更張置之仁壽而明勲照遠智不
周物兼以歲之不易未遑卜征興言夕惕無忘
監寐可分遣內侍周省四方觀政聽謠訪賢舉

滯其有田野不闢獄訟無章忘公殉私侵漁是
務者悉隨事以聞若懷寶迷邦蘊竒待價蓄響
藏真不求聞達竝依名騰奏罔或遺隱使輶軒
所屆如朕親覽焉又詔曰金作贖刑有聞自昔
入縑以免施於中代民悅法行莫尚乎此永言
叔世偷薄成風嬰僞言入罪厥塗匪一斷弊之書
日纏於聽覽鉗鈇之刑歲積於牢犴死者不可
復生生者無因自返由此而望滋實庸可致乎
朕夕惕思治念崇政術斟酌前王擇其令典有

可以憲章邦國罔不由之庶愧心於四海昭情
素於萬物俗僞日久禁網彌繁漢文四百邈焉
已遠雖省事清心無忘日用而委銜廢策事未
獲從可依周漢舊典有罪入贖外詳爲條格以
時奏聞辛未以中領軍蔡道恭爲司州刺史以
新除謝沐縣公蕭寶義爲巴陵王以奉齊祀復
南蘭陵武進縣依前代之科徵謝朓爲左光祿
大夫開府儀同三司何胤爲右光祿大夫改南
東海爲蘭陵郡土斷南徐州諸僑郡縣癸酉詔

三才圖會卷二
日商俗用移遺風尚熾下不上達由來遠矣外
中馭索增其慄然可於公車府謗木肺石傍各
置一函若肉食莫言山阿欲有橫議投謗木函
若從我江漢功在可策犀兕徒弊龍蛇方縣次
身才高妙擯壓莫通懷傅呂之術抱屈賈之歎
其理有皦然受困包匭夫大政侵小豪門陵賤
四民已窮九重莫達若欲自申竝可投肺石函
甲戌詔斷遠近上慶禮又詔曰禮闈文閣宜率
舊章貴賤既位各有差等俯仰拜伏以明王度

濟濟洋洋具瞻斯在頃因多難治綱施落官非
積及榮由幸至六軍尸四品之職青紫治白簿
之勞振衣朝伍長揖卿相趨步廣闊竝驅丞郎
遂冠履倒錯珪旣莫辨靜言疚懷思返流弊且
翫法情官動成通施罰以常科終未懲革夫櫝
楚申威蓋代斷趾笞捶有令如或可從外詳共
平議務盡厥理癸未詔相國府職吏可依資勞
度臺若職限已盈所度之餘及驃騎府竝可賜
滿閏月丁酉以行宕昌王梁彌邕爲安西將軍

河涼二州刺史正封宕昌王壬寅以車騎將軍
夏侯詳爲右光祿大夫詔曰成務弘風肅厲內
外寔由設官分職互相懲糾而頃壹拘常式
見失方奏多容違惰莫肯執咎憲綱日弛漸以
爲俗今端右可以風聞奏事依元熙舊制五月
乙亥夜盜入南北掖燒神獸門摠章觀害衛尉
卿張弘策戊子江州刺史陳伯之舉兵反以領
軍將軍王茂爲征南將軍江州刺史率衆討之
六月庚戌以行北秦州刺史楊紹先爲北秦州

刺史武都王是月陳伯之奔魏江州平前益州
刺史劉季連據成都反八月戊戌置建康三官
乙巳平北將軍西涼州刺史象舒彭進號安西
將軍封鄧至王丁未詔中書監王瑒等八人參
定律令是月詔尚書曹郎依晉奏事林邑千阇
利國各遣使獻方物冬十一月己未立小廟甲
子立皇子統爲皇太子十二月景申以國子祭
酒張稷爲護軍將軍辛亥護軍將軍張稷免是
歲大旱米斗五千人多餓死

二年春正月甲寅朔詔曰三計五聽著自聖典
哀矜折獄義重前誥蓋所以明慎用刑深戒疑
枉成功致治罔不由茲朕自藩部常躬訊錄求
理得情洪細必盡末運弛網斯政又闕牢犴沈
壅申訴靡從朕屬當期運君臨兆億雖復齊居
宣室留心聽斷而九牧遐荒無因臨覽深懼懷
冤就鞫匪惟一方可申敕諸州月一臨訊博詢
擇善務在確實乙卯以尚書僕射沈約爲尚書
左僕射吏部尚書范雲爲尚書右僕射前將軍

鄱陽王恢爲南徐州刺史尚書令王亮爲左光祿大夫右衛將軍柳慶遠爲中領軍景辰尚書令新除左光祿大夫王亮免夏四月癸卯尚書刪定郎蔡法度上梁律二十卷令三十卷科四十卷五月丁巳尚書右僕射范雲卒乙丑益州刺史鄧元起克成都曲赦益州壬申斷諸郡縣獻奉二宮惟諸州及會稽職惟嶽牧許薦任土若非地產亦不得貢六月丁亥詔以東陽信安豐安三縣水潦漂損居民資業遣使周履量蠲

課調是夏多癘疫以新除左光祿大夫謝朓爲
司徒尚書令甲午以中書監王瑩爲尚書右僕
射秋七月扶南龜茲中天竺國各遣使獻方物
冬十月魏寇司州十一月乙卯雷電大雨晦是
夜又雷乙亥尚書左僕射沈約以母憂去職

三年春正月戊申後將軍揚州刺史臨川王宏
進號中軍將軍癸丑以尚書右僕射王瑩爲尚
書左僕射太子詹事柳惔爲尚書右僕射前尚
書左僕射沈約爲鎮軍將軍二月魏陷梁州三

月隕霜殺草五月丁巳以扶南國王憍陳如闍
耶跋摩爲安南將軍六月景子詔曰昔哲王之
宰世也每歲上征躬事巡省民俗政刑罔不必
逮末代風凋久曠茲典雖欲肆遠忘勞究臨幽
仄而居今行古事未易從所以日晏踟躕情同
再撫摠摠九州遠近民庶或川路幽遐或貧羸
老疾懷冤抱理莫由自申所以東海匹婦致災
邦國西土孤魂登樓請訴念此于懷中夜太息
可分將命巡行州部其有深冤鉅害抑鬱無歸

聽詣使者依源自列庶以矜隱之念昭被四方
湯聽遠聞事均親覽癸未大赦天下秋七月丁
未以光祿大夫夏侯詳爲車騎將軍湘州刺史
湘州刺史楊公則爲中護軍甲子立皇子綜爲
豫章郡王八月魏陷司州詔以南義陽置司州
九月壬子河南王世子伏連籌爲鎮西將軍西
秦河二州刺史河南王北天竺國遣使獻方物
冬十一月甲子詔曰設教因時淳薄異政刑以
世革輕重殊風昔罔俗未移民散久矣嬰網陷

辟日夜相尋若悉加正法則赭衣塞路竝申弘宥則難用爲國故使有罪入贖以全元元之命今遐邇知禁罔狎稍虛率斯以往庶幾刑措金作權典宜在蠲息可除贖罪之科是歲多疾疫

四年春正月癸卯朔詔曰今九流常選年未三十不通一經不得解褐若有才同甘顏勿限年次置五經博士各一人以鎮北將軍雍州刺史建安王偉爲南徐州刺史南徐州刺史鄱陽王恢爲郢州刺史中領軍柳慶遠爲雍州刺史丙午

省鳳皇銜書伎戊申詔曰夫禋郊饗帝至敬攸
在致誠盡懃猶懼有違而往代多令宮人縱觀
茲禮惟宮廣設輜輶耀路非所以仰虔蒼昊昭
感上靈屬車之間見譏前世便可自今停止辛
亥輿駕親祠南郊赦天下二月壬午遣衛尉卿
楊公則率宿衛兵塞洛口壬辰交州刺史李凱
據州反長史李叟討平之曲赦交州戊戌以前
郢州刺史曹景宗爲中護軍是月立建興苑於
秣陵建興里夏四月丁巳以行宕昌王梁彌博

爲安西將軍河涼二州刺史宕昌王是月自甲寅至壬戌甘露連降華林園五月辛卯建康縣朔陰里生嘉禾一莖十二穗六月庚戌立孔子廟壬戌歲星晝見秋七月辛卯右光祿大夫張瓌卒八月庚子老人星見冬十月丙午北伐以中軍將軍揚州刺史臨川王宏都督北討諸軍事尚書右僕射柳惔爲副是歲以興師費用王公以下各上國租及田穀以助軍資十一月辛未以都官尚書張稷爲領軍將軍甲午天晴朗

西南有電光聞如雷聲三十二月司徒尚書令謝朓以所生母憂去職是歲大穰米斛三十

五年春正月丁卯朔詔曰在昔周漢取士方國頃代凋訛幽仄罕被人孤地絕用隔聽覽士操淪胥因茲靡勸豈其岳瀆縱靈偏有厚薄寔由知與不知用與不用耳朕以菲德君此兆民而兼明廣照屈於堂戶飛耳長目不及四方永言愧懷無忘矧矧凡諸郡國舊族邦內無在朝位者選官搜括使郡有一人乙亥以前司徒謝朓

爲中書監司徒衛將軍鎮軍將軍沈約爲右光祿大夫豫章王綜爲南徐州刺史丁丑以尚書左僕射王瑩爲護軍將軍僕射如故甲申立皇子諱爲晉安郡王丁亥太白晝見二月庚戌以太常張充爲吏部尚書三月景寅朔日有蝕之癸未魏宣武帝從弟翼率其諸弟來降輔國將軍劉思效破魏青州刺史元繫於膠水丁亥陳伯之自壽陽率衆歸降夏四月丙申廬陵高昌之仁山獲銅劍二始豐縣獲八目龜一甲寅詔

三
日朕昧且齊居惟刑是恤三辟五聽寢興載懷
故陳肺石於都街增官司於詔獄殷懃親覽小
大以情而明慎未洽囹圄尚擁永言納隍在予
興愧凡犴獄之所可遣法官近侍遞錄囚徒如
有枉滯以時奏聞五月辛未太子左衛率張惠
紹克魏宿預城乙亥臨川王安前軍克梁城辛
巳豫州刺史韋叡克合肥城丁亥廬江太守裴
邃克羊石城庚寅又克霍丘城辛卯太白晝見
六月庚子青冀二州刺史桓和前軍克朐山城

秋七月乙丑鄧至國遣使獻方物八月戊戌老人星見辛酉作太子宫冬十一月甲子京師地震乙丑以師出淹時大赦天下魏寇鍾離遣右衛將軍曹景宗率衆赴援十二月癸卯司徒謝朏薨

六年春正月辛酉朔詔曰徑寸之寶或隱沙泥以人廢言君子斯戒朕聽朝晏罷思聞政術雖百辟卿士有懷必聞而蓄響邊遐未臻魏闕或屈以貧陋或間以山川頓足延首無因奏達豈

所以沈浮靡漏遠邇兼得者乎四方士民若有
欲陳言刑政益國利民淪礙幽遠不能自通者
可各詮條布懷於刺史二千石有可申採大小
以聞已卯詔曰夫有天下者義非爲己凶荒疾
癘兵革水火有一於此責歸元首今祝史請禱
繼諸不善以朕身當之永使災害不及萬姓俾
茲下民稍蒙寧息不得爲朕祈福以增其過時
班遠邇咸令遵奉二月甲辰老人星見三月庚
申朔隕霜殺草是月有三象入京師夏四月壬

辰置左右驍騎左右游擊將軍官癸巳曹景宗
韋叡等破魏軍於邵陽洲斬獲萬計癸卯以右
衛將軍曹景宗為領軍將軍徐州刺史己酉以
江州刺史王茂為尚書右僕射中書令安成王
秀為平南將軍江州刺史分湘廣二州置衡州
丁巳以中軍將軍揚州刺史臨川王宏為驃騎
將軍開府儀同三司撫軍將軍建安王偉為揚
州刺史右光祿大夫沈約為尚書左僕射尚書
左僕射王瑒為中軍將軍五月己未以新除左

梁書卷二十一
驍騎將軍長沙王深業爲中護軍癸亥以侍中
袁昂爲吏部尚書己巳置中衛中權將軍改驍
騎爲雲騎游擊爲游騎辛未右將軍揚州刺史
建安王偉進號中權將軍六月庚戌以車騎將
軍湘州刺史夏侯詳爲左光祿大夫新除金紫
光祿大夫柳惔爲安南將軍湘州刺史新吳縣
獲四目龜一秋七月甲子太白晝見景寅分廣
州置桂州丁亥以新除尚書右僕射王茂爲中
衛將軍八月戊子赦天下戊戌大風折木京師

大水因濤入加御道七尺九月嘉禾一莖九穗
生江陵縣丁亥改闕武堂爲德陽堂聽訟堂爲
儀賢堂景戌以左衛將軍呂僧珍爲平北將軍
南兖州刺史豫章內史蕭昌爲廣州刺史冬十
月壬寅以五兵尚書徐勉爲吏部尚書閏月乙
丑以驃騎將軍開府儀同三司臨川王宏爲司
徒行太子太傅尚書左僕射沈約爲尚書令行
太子少傅吏部尚書袁昂爲左僕射戊寅平西
將軍荊州刺史始興王憺進號安西將軍甲申

宋書卷三
十六
以光祿大夫夏侯詳爲尚書左僕射十二月丙
辰尚書左僕射夏侯詳卒乙丑魏淮陽鎮都軍
主常邕和以城內屬分豫州置霍州

七年春正月乙酉朔詔曰建國君民立教爲首
不學將落嘉植靡由朕肇基明命光宅區宇
雖耕耘雅業傍闡藝文而成器未廣志本猶闕
非所以鎔範貴遊納諸軌度思欲式敦讓齒自
家刑國今聲訓所漸戎夏同風宜大啓庠黉博
延胄子務彼十倫弘此三德使陶鈞遠被微言

載表中衛將軍領太子詹事王茂進號車騎將
軍戊戌作神龍仁獸闕於端門大司馬門外壬
子以領軍將軍曹景宗爲中衛將軍衛尉蕭
景兼領軍將軍二月乙卯廬江瀟縣獲銅鍾二
新作國門于越城南乙丑增置鎮衛將軍以下
各有差庚午詔於州郡縣置州望郡宗鄉豪各
一人專掌搜薦乙亥以車騎大將軍高麗王高
雲爲撫軍大將軍開府儀同三司平北將軍南
兖州刺史呂僧珍爲領軍將軍景字以中護軍長沙

王深業爲南兖州刺史兼領軍將軍蕭景爲雍州刺史雍州刺史柳慶遠爲護軍將軍夏四月乙卯皇太子納妃赦大辟以下頒賜朝臣及近侍各有差辛未秣陵縣獲靈龜一戊寅餘姚縣獲古銅劔二五月己亥詔復置宗正太僕大匠鴻臚又增太府太舟仍先爲十二卿癸卯以平南將軍江州刺史安成王秀爲平西將軍荊州刺史安西將軍荊州刺史始興王憺爲護軍將軍中衛將軍曹景宗爲安南將軍江州刺史六

月辛酉復建修二陵周回五里內居民改陵監
爲令秋七月丁亥月犯氐八月癸丑安南將軍
江州刺史曹景宗卒丁巳赦大辟以下未結正
者甲戌平西將軍荊州刺史安成王秀進號安
西將軍雲麾將軍郢州刺史鄱陽王恢進號平
西將軍老人星見九月丁亥詔曰芻牧必往姬
文垂則雉兔有刑姜宣致貶藪澤山林毓材是
出斧斤之用比屋所資而頃世相承竝加封固
豈所謂與民同利惠茲黔首凡公家諸屯戍見

封燭者可悉開常禁壬辰置童子奉車郎癸巳
立皇子績爲南康郡王己亥月犯東井冬十月
景寅以吳興太守張穆爲尚書左僕射景子魏
陽關主許敬珍以城內附詔大舉北伐以護軍
將軍始興王憺爲平北將軍率衆入清車騎將
軍王茂率衆向宿預丁丑魏懸瓠鎮軍主白阜
生豫州刺史胡遜以城內屬以阜生爲鎮北將
軍司州刺史遜爲平北將軍豫州刺史十一月
辛巳鄞縣言甘露降

八年春正月辛巳輿駕親祠南郊赦天下内外
文武各賜勞一年壬辰魏鎮東參軍成景雋斬
宿潁城主嚴仲寶以城内屬二月壬戌老人星
見夏四月以北巴西郡置南梁州戊申以護軍
將軍始興王憺爲中衛將軍司徒行太子太傅
臨川王宏爲司空揚州刺史車騎將軍領太子
詹事王茂即本號開府儀同三司丁卯魏楚王
城主李國興以城内附景子以中軍將軍丹陽
尹王瑩爲右光祿大夫五月壬午詔曰學以從

政殷勤往哲祿在其中抑亦前事朕思闡治綱
每敦儒術軾間闢館造次以之故負裘成風甲
科間出方當置諸周行飾以青紫其有能通二
經始末無倦者策實之後選可量加敘錄雖復
牛監羊肆寒品後門竝隨才試吏勿有遺隔秋
七月癸巳巴陵王蕭寶義薨八月戊午老人星
見冬十月乙巳以中軍將軍始興王憺爲鎮北
將軍南兖州刺史南兖州刺史長沙王深業爲
護軍將軍

九年春正月乙亥以尚書令行太子少傅沈約
爲左光祿大夫行少傅如故右光祿大夫王瑩
爲尚書令行中撫將軍建安王偉領護軍將軍
鎮北將軍南兖州刺史始興王憺爲鎮西將軍
益州刺史太常卿王亮爲中書監景子以輕車
將軍晉安王諱爲南兖州刺史庚寅新作緣淮
塘北岸起石頭迄東冶南岸起後渚籬門迄三
橋三月己丑車駕幸國子學親臨講肆賜國子
祭酒以下帛各有差乙未詔曰王子從學箸自

禮經貴遊咸在實惟前誥所以式廣義方克隆
教道今成均大啓元良齒讓自斯以降竝宜肄
業皇太子及王侯之子年在從師者可令入學
于闐國遣使獻方物夏四月丁巳革選尚書五
都令史用寒流林邑國遣使獻白猴一五月己
亥詔曰朕達聽思治無忘日昃而百司羣務其
途不一隨時適用各有攸宜若非總會衆言無
以備茲親覽自今臺閣省府州郡鎮戍應有職
僚之所時共集議各陳損益具以奏聞中書監

王亮卒六月癸丑盜殺宣城太守朱僧勇癸酉
以中撫將軍領護軍建安王偉爲鎮南將軍江
州刺史閏月己丑宣城盜轉寇吳興縣太守蔡
搏討平之秋七月己巳老人星見冬十二月癸
未輿駕幸國子學策試胄子賜訓授之司各有差
十年春正月辛丑輿駕親祠南郊大赦天下居
局治事賜勞二年癸卯以尚書左僕射張穆爲
安北將軍青冀二州刺史郢州刺史鄱陽王恢
爲護軍將軍甲辰以南徐州刺史豫章王綜爲

郢州刺史輕車將軍南康王績爲南徐州刺史
戊申騶虞一見荊州華容縣以左民尚書王暕
爲吏部尚書辛酉輿駕親祠明堂三月辛丑盜
殺東莞琅邪二郡太守鄧昕以朐山引魏軍遣
振遠將軍馬仙琕討之是月魏徐州刺史盧昶
帥衆赴朐山夏五月癸酉安豐縣獲一角玄龜
丁丑領軍呂僧珍卒己卯以國子祭酒張充爲
尚書左僕射太子詹事柳慶遠爲領軍將軍乙
酉嘉蓮一莖三花生藥遊苑秋七月景辰詔曰

昔公卿面陳載在前史令僕陞奏列代明文所以釐彼庶績成茲羣務晉氏陵替虛誕爲風自此相因其失彌遠遂使武帳空勞無汲公之奏丹墀徒闕闕鄭生之履三槐八座應有務之百官宜有所論可入陳啓庶藉周爰少匡寡薄九月景申天西北隆隆有聲赤氣下至地冬十二月癸酉山車見于臨成縣庚辰馬仙理大破魏軍斬馘十餘萬剋復朐山城是歲初作宮城門三重樓及開二道宕昌國遣使獻方物

十一年春正月壬辰詔曰夫刑法悼耄罪不收
孥禮著明文彰前事蓋所以申其哀矜故罰
有弗及近代相因厥網彌峻髮年華髮同坐入
讐雖懲惡勸善宜窮其制而老幼流離良亦可
愍自今逋謫之家及罪應質作若年有老小可
停將送加左光祿大夫行太子少傅沈約特進
鎮南將軍江州刺史建安王偉儀同三司司空
楊州刺史臨川王宏進位爲太尉驃騎將軍王
茂爲司空尚書令雲麾將軍王瑩進號安左將

軍安北將軍青冀二州刺史張稷進號領北將
軍二月戊辰新昌濟陽二郡野蠶成繭三月丁
巳曲赦揚徐二州築西靜壇於鍾山庚申高麗
國遣使獻方物四月戊子詔曰去歲胹山大殲
醜類宜爲京觀用旌武功但伐罪弔民皇王盛
軌掩骼埋胔仁者用心其下青州悉使收藏百
濟扶南林邑國竝遣使獻方物六月辛巳以司
空王茂領中權將軍九月辛亥宕昌國遣使獻
方物冬十一月乙未以吳郡太守素昂兼尚書

三ノ十五
右僕射已酉降太尉楊州刺史臨川王宏爲驃
騎將軍開府同三司之儀癸丑齊宣德太妃王
氏薨十二月己未以安西將軍荊州刺史安成
王秀爲中衛將軍護軍將軍鄱陽王恢爲平西
將軍荊州刺史

十二年春正月辛卯輿駕親祠南郊赦大辟以
下二月辛酉以兼尚書右僕射袁昂爲尚書左
僕射景寅詔曰掩骼埋胔義重周經榘櫨有加
事美漢策朕向隅載懷每勤造次收藏之命亟

哀矜而寓縣遐深遵奉未洽髡然路隅往往
而有言愍沈枯彌勞傷惻可明下遠近各巡境
界若委骸不葬或除衣莫改即就收斂量給棺
具庶夜哭之魂斯慰霑霜之骨有歸辛巳新作
太極殿改爲十三間三月癸卯以湘州刺史王
珍國爲護軍將軍閏月乙丑特進中軍將軍沈
約卒夏四月京邑大水六月癸巳新作太廟增
基九尺庚子太極殿成秋九月戊午以鎮南將
軍開府儀同三司江州刺史建安王偉爲撫軍

將軍儀同如故驃騎將軍開府同三司之儀揚
州刺史臨川王宏爲司空領中權將軍王茂爲
驃騎將軍開府同三司之儀江州刺史冬十月
丁亥詔曰明堂地勢卑濕未稱乃心外可量就
埤起以盡誠敬

十三年春正月壬戌以丹陽尹晉安王諱爲荆
州刺史癸亥以平西將軍荊州刺史鄱陽王恢
爲鎮西將軍益州刺史景寅以翊右將軍安成
王秀爲安西將軍郢州刺史二月丁亥輿駕親

耕籍田赦天下孝悌力田賜爵一級老人星見
三月辛亥以新除中撫將軍開府儀同三司建
安王偉爲左光祿大夫夏四月辛卯林邑國遣
使獻方物壬辰以郢州刺史豫章王綜爲安右
將軍五月辛亥以通直散騎常侍韋叡爲中護
軍六月己亥以南兖州刺史蕭景爲領軍將軍
領軍將軍柳慶遠爲安北將軍雍州刺史秋七
月乙亥立皇子綸爲邵陵郡王繹爲湘東郡王
紀爲武陵郡王八月癸卯扶南于闐國各遣使

獻方物是歲作浮山堰

十四年春正月乙巳朔皇太子冠赦天下賜爲
父後者爵一級王公以下班賚各有差停遠近
上慶禮景午安左將軍尚書令王瑩進號中權
將軍以鎮西將軍始興王憺爲中撫將軍辛亥
輿駕親祠南郊詔曰朕恭祗明祀昭事上靈臨
竹宮而登泰壇服裘冕而奉蒼璧柴望旣升誠
敬克展思所以對越乾元弘宣德教而缺于治
道政法多昧實佇羣才用康庶績可班下遠近

博採英異若有確然鄉黨獨行州閭肥遯丘園
不求聞達藏器待時未加收採或賢良方正孝
悌力田竝即騰奏具以名上當擢彼周行試以
邦邑庶百司咸事兆民無隱又世輕世重隨時
約法前以勦墨用代重辟猶念改悔其路已壅
竝可省除景寅汝陰王劉涓薨二月庚寅芮芮
國遣使獻方物戊戌老人星見辛丑以中護軍
韋叡爲平北將軍雍州刺史新除中撫將軍始
興王憺爲荊州刺史夏四月丁丑驃騎將軍開

府同三司之儀江州刺史王茂薨五月丁巳以
荊州刺史晉安王諱爲江州刺史秋八月乙未
老人星見九月癸亥以長沙王深業爲護軍將
軍狼牙脩國遣使獻方物

十五年春正月己巳詔曰觀時設教王政所先
兼而利之寔惟務本移風致治咸由此作頃因
革之令隨事必下而張弛之要未臻厥宜民瘼
猶繁廉平尚寡所以竚旒纁而載懷朝玉帛而
興歎可申下四方政有不便於民者所在具條

以聞守宰若清潔可稱或侵漁爲蠹分別奏上
將行黜陟長吏勸課躬履堤防勿有不脩致妨
農事關市之賦或有未允外時參量優減舊格
三月戊辰朔日有蝕之夏四月丁未以安右將
軍豫章王綜兼護軍高麗國遣使獻方物五月
癸未以司空揚州刺史臨川王宏爲中書監驃
騎大將軍刺史如故六月景申改作小廟畢庚
子以尚書令王瑩爲左光祿大夫開府儀同三
司尚書右僕射袁昂爲尚書左僕射吏部尚書

王暕爲尚書右僕射秋八月老人星見芮芮河
南遣使獻方物九月辛巳左光祿大夫開府儀
同三司王瑩薨壬辰赦天下冬十月戊午以丹
陽尹長沙王深業爲湘州刺史十一月丁卯以
兼護軍豫章王綜爲安前將軍交州刺史李叟
斬交州反者阮宗孝傳首京師曲赦交州壬午
以雍州刺史韋叡爲護軍將軍

十六年春正月辛未輿駕親祠南郊詔曰朕當
履思治政道未明昧旦劬勞亟移星紀今太皞

御氣句芒首節升中就陽禋敬克展務承天休
布茲和澤尤貧之家勿收今年三調其無田業
者所在量宜賦給若民有產子即依格優蠲孤
老鰥寡不能自存咸加賑卹班下四方諸州郡
縣時理獄訟勿使冤滯竝若親覽二月庚戌老
人星見甲寅以安前將軍豫章王綜爲南徐州
刺史三月景子河南王遣使獻方物夏四月甲
子初去宗廟牲潮溝獲白雀一六月戊申以廬
陵王續爲江州刺史七月丁丑以郢州刺史安

成王秀爲鎮北將軍雍州刺史八月辛丑老人
星見扶南婆利國各遣使獻方物冬十月去宗
廟薦脩始用蔬果

十七年春正月丁巳朔詔曰夫樂所自生含識
之常性厚下安宅馭世之通規朕矜此庶氓無
忘待旦亟弘生聚之略每布寬恤之恩而編戶
未滋遷徙尚有輕去故鄉豈其本志資業殆闕
自返莫由巢南之心亦何能弭今開元發歲品
物惟新思俾黔黎各安舊所將使郡無曠土邑

靡游民鷄犬相聞桑柘交畛凡天下之民有流
移他境在天監十七年正月一日以前可開恩
半歲悉聽還本蠲課三年其流寓過遠者量加
程日若有不樂還者即使著土籍爲民准舊課
輸若流移之後本鄉無復居宅者村司三老及
餘親屬即爲詣縣占請村內官地官宅令相容
受使戀本者還有所託凡坐爲市埭諸職割盜
衰滅應被封籍者其田宅車牛是民生之具不
得悉以沒入皆優量分留使得自止其商賈富

室亦不得頓相兼併遁叛之身罪無輕重竝許
首出還復民伍若有拘限自還本役竝爲條格咸
使知聞二月癸巳鎮北將軍雍州刺史安成王
秀薨甲辰大赦天下乙卯以領石頭戍事南康
王績爲南兖州刺史三月甲申老人星見景申
改封建安王偉爲南平王夏五月戊寅驃騎大
將軍揚州刺史臨川王宏免己卯于阗利國遣
使獻方物以領軍將軍蕭景爲安右將軍監揚
州辛巳以臨川王宏爲中軍將軍中書監六月

乙酉以益州刺史鄱陽王恢爲領軍將軍中軍
將軍中書監臨川王宏以本號行司徒癸卯以
國子祭酒蔡撙爲吏部尚書秋八月壬寅老人
星見詔以兵騶奴婢男年登六十女年登五十
免爲平民冬十月乙亥以中軍將軍行司徒臨
川王宏爲中書監司徒十一月辛亥以南平王
偉爲左光祿大夫開府儀同三司

十八年春正月甲申以領軍將軍鄱陽王恢爲
征西將軍開府儀同三司荊州刺史荊州刺史

始興王憺爲中撫將軍開府儀同三司領軍以
尚書左僕射袁昂爲尚書令尚書右僕射王暕
爲尚書左僕射太子詹事徐勉爲尚書右僕射
辛卯輿駕親祠南郊孝悌力田賜爵一級二月
戊午老人星見四月丁巳大赦天下秋七月甲
申老人星見于闐扶南國各遣使獻方物

紀第二

梁書